



BIOALAI, ASOCIACIÓN DE CONSUMO ECOLÓGICO / KONTSUMO EKOLOGIKOAREN ELKARTEAREN ESTATUTUAK

LEHENENGO KAPITULUA

IZENA

1. artikulua.- 1993ko abenduaren 21ean AS/A/4264/93. erregistro-zenbakiarekin inskribatutako Vitoria-Gasteizko BIOALAI, ASOCIACIÓN DE CONSUMO ECOLÓGICO / KONTSUMO EKOLOGIKOAREN ELKARTEAREN Estatutu hauek aldatu egin dira, Euskadiko Elkarteei buruzko ekainaren 22ko 7/2007 Legean eta Elkartzeko Eskubidea arautzen duen martxoaren 22ko 1/2002 Lege Organikoan ezarritakoen arabera eta Euskal Herriaren Autonomia Estatutuaren 9. eta 10.13 artikuluetan azaltzen denarekin bat etorritz.

Elkartea arau hauen mende egongo da: aipatutako elkarteei buruzko legeak, estatutu hauek (legearen aurkakoak ez badira), elkartearen gobernu-organoek behar bezala hartutako erabakiak (legearen edota estatutuen aurkakoak ez badira) eta Eusko Jaurlaritzak onesten dituen erregelamenduzko xedapenak (azken horiek osagarriak izango dira).

ELKARTEAREN HELBURUAK

2. artikulua.- Elkarte honen helburuak honako hauek dira:
- Sozialki eta inguruareriko jasangarriak diren ekoizpen sistemaren bidez lortutako elikagai eta beste ondasun batzuk bazkideei ematea. Baita ere zerbitzuak eskaintze (ekitaldiak, lan-saioak, ikastaroak, etab.).
 - Kontsumo-ohitura solidario eta arduratsuak defendatzea, bultzatzea eta jakinaraztea.
 - Oinarri agroekologikoak dituzten ekoizpen-, eraldatze- eta banaketa-jarduerak babestea.
 - Kontsumitzaileen eta erabiltzaileen legezko eskubide eta babesak defendatzea.
 - Xede horiek garatzeko, beste erakunde batzuekin sareak sortzea.

Hori dela eta, printzipio ekologiko eta gizarte-ekitatearen alde dago BioAlai. Helburu horiek lortzeko, jarduera hauek egingo dira, ezarritako legezko betekizunak bete ondoren:

- BioAlaiko kontsumitzaileen eta ekoizleen —bereziki tokikoen— artean, ezagutzan oinarritutako harreman solidarioa ezartzea.
- Helburu berberak dituzten elkarte eta erakundeekin elkarrekin lan egitea.
- Helburuak betetzeko edo horretarako baliabideak lortzeko, erantzukizun sozialaren printzipioekin bat datozen jarduera ekonomikoak gauzatzea.
- Bere jarduera gauzatzeko eta dituen xedeak lortzeko, beharrezkoak diren ondasunak erostea eta edukitzea, baita egintzak gauzatzea eta kontratuak sinatzea ere.
- Jarduera guztiak legeak eta estatutu hauek betez egingo dira, bai, halaber, berdintasunezko harremanak bultzatuz, bazkide eta langileak zaintzea bilatuz eta euskara sustatuz, beste zenbait balioren artean.

ELKARTEAREN EGOITZA

3. artikulua.- Elkarte honen egoitza nagusia Txalaparta kalea 19-21-23, Vitoria-Gasteiz izango da.
- Elkarteak beste lokal batzuk ere eduki ditzake Autonomia Erkidegoan, Batzar Orokorrak hala erabakitzen badu.

LURRALDE-EREMUA

4. artikulua.- Elkarte honek nagusiki lurralde-eremu honetan gauzatuko ditu bere zereginak: Euskal Autonomia Erkidegoa.

IRAUPENA ETA DEMOKRAZIA-ARAU

5. artikulua.- Elkarte iraunkorra izateko eratu da, eta IV. kapituluan esaten den bezala ezohiko batzar orokorrean hartutako erabaki bidez baino ezingo da desegin, edo legeetan aurreikusitako arrazoiren batengatik.
- Elkartearen funtzionamendua eta barne-antolamendua demokratikoa izango da, eta pluraltasuna erabat errespetatuko da. Erabat deusezak izango dira elkartzeko oinarrizko eskubidearen alderdietako edozein betetzen ez duten itunak, estatutu-xedapenak eta erabakiak.

BIGARREN KAPITULUA

AGINTE- ETA ADMINISTRAZIO-ORGANOAK

6. artikulua.- Elkartearen agintea eta administrazioa batez ere kide anitzeko honako organo hauen esku egongo da:
- Bazkideen Batzar Orokorra izango da organo gorena.
 - Zuzendaritza Batzordea izango da kide anitzeko zuzendaritza-organoa iraunkorra.

BATZAR OROKORRA

7. artikulua.- Batzar Orokorra bazkide guztiek osatzen dute, eta organo honen bidez adierazten dira bazkideen nahiak.
- Batzar Orokorraren ahalmenak:
- a) Aurreko batzarren aktak onartzea, beti ere horiek bazkideei igorri eta gero.
 - b) Elkartearen jarduera-plan orokorra onartzea.
 - c) Urteko kontuak eta hurrengo ekitaldiko aurrekontua aztertu eta onartzea.
 - d) Zuzendaritza Batzordearen kudeaketa onartzea.
 - e) Estatutuak aldatzea.
 - f) Elkartearen barne-araudia onartzea
 - g) Elkarte desegitea.
 - h) Lehendakaria, idazkaria, diruzaina eta kide anitzeko aginte-organoko gainontzeko kideak, baldin badaude, izendatzea eta kargutik kentzea; eta horiek guztiak ikuskatu eta kontrolatzea.
 - i) Beste elkarte batzuekin batera federazioak eta konfederazioak osatzea, edota horietatik ateratzea.
 - j) Ondasun higiezinak erabili edo besterentzeko erabakiak hartzea.
 - k) Aginte-organoko kideei ordaindu egin behar zaiela erabakitzea, hala komeni bada.

- l) Kuota arruntak eta bereziak ezartzea. Ahalmen hau, hala ere, Batzar Orokorrak aginte-organoari eskuordetu diezaioke horretarako bereziki hartutako erabakiaren bidez.
 - m) Bazkideak behin betiko kanporatzeko erabakia hartzea.
 - n) Beste organo sozialen bati esleitu gabeko beste edozein eskumen.
8. artikulua.- Batzar Orokorrak ohiko bilkurak eta ezohiko bilkurak egingo ditu.
9. artikulua.- Batzar Orokorrak gutxienez urtean behin egin beharko du ohiko bilkura: urteko ekitaldia itxi ondoren, lehenengo seihilekoan izango da, 7. artikuluko a), b), c) eta d) idatz-zatietan zehaztutako erabakiak hartze aldera.
10. artikulua.- Batzar Orokorra Zuzendaritza Batzordeak erabakitzen duenean bilduko da ezohiko bilkuran, bere ekimenez edota bazkideen % 20ak eskatu duelako. Bilkura eskatzeko arrazoiak eta helburuak azaldu beharko dira baina, nolana ere, honako gaiak aztertzeko eta erabakitzeko bilduko da:
- a) Estatutuak aldatzeko.
 - b) Elkartea desegiteko.
11. artikulua.- Batzar Orokorra biltzeko deialdiak idatziz egin behar dira, eta bilkuren tokoa, eguna eta ordua adierazi beharko dira, bai eta gai-zerrenda ere, eztabaidatuko diren gaien aipamen zehatzarekin. Deialdia egiten denetik gutxienez hamabost egun pasatu beharko dira bilkura lehen deialdian egiteko. Hala badagokio, bigarren deialdiaren data eta ordua ere adieraz daitezke. Dena dela, deialdi batetik bestera gutxienez ordu erdiko tartea utzi beharko da.
- Batzar orokorrak, ohikoak nahiz ezohikoak, lehenengo deialdian balio osoz eratuta geratuko dira botoa emateko eskubidea duten bazkideen herena bertaratzen bada; eta bigarren deialdian, botoa emateko eskubidea duten bazkideen kopurua edozein dela ere.
12. artikulua.- Batzar Orokorraren erabakiak gehiengo soilez hartuko dira, hau da, bertaratuen nahiz ordezkatuena baiezko botoak ezezkoak baino gehiago direnean. Alabaina, honako akordio hauetarako gehiengo kualifikatua beharko da, (bertaratuen edo ordezkatuena 3/4):
- a) Elkartea desegitea.
 - b) Estatutuak aldatzea.
 - c) Ondasunak erabili edo besterentzea.
 - d) Ordezkaritza-organoko kideei ordaintzea.
 - e) Zuzendaritza Batzordeak behin-behinean kargugabetu duen batzordekide bat behin betiko kargugabetzea.
13. artikulua.- Bazkideek beste edozein bazkideren esku utzi dezakete batzar orokorretara joateko ordezkaritza. Ordezkaritza hori idatziz eskuordetu beharko da, eta Batzarreko idazkariari eman bilera baino gutxienez ordu erdi lehenago. Elkartearen egoitza dagoen herritik kanpo bizi diren bazkideek ordezkaritza beste norbaiten esku uzteko agiria postaz bidali dezakete.

ZUZENDARITZA-BATZORDEA

14. artikulua.- Zuzendaritza Batzordea da Batzar Orokorraren xedapen eta zuzentzara arauari jarraikiz elkartearen interesak kudeatu eta ordezkatzeko dituen organoa. Bazkideek baino ezingo dute osatu ordezkari-organoa. Zuzendaritza Batzordea osatuko dutenak honakoak izango dira:
- Lehendakari bat
 - Lehendakariorde bat
 - Idazkari bat
 - Diruzain bat
 - Hiru Batzordekide
- Gutxienez hilean behin bildu beharko dute, dela aurrez aurreko batzarrean, dela beste edozein komunikazio bitarteko edo kanal erabilita. Lehendakariaren edo Zuzendaritza Batzordeko hiru kideren eskariz ere bildu beharko du, baita elkartearen jarduerak egoki betetzeko behar den guztietan ere.
15. artikulua.- Zuzendaritza Batzordeko kideren bat bilera horietara hiru aldiz jarraian, edo, tarteka lau aldiz agertzen ez bada, dagokion kargua utzi egin beharko du, hutsegite horiek ez baditu arrazoitzen.
16. artikulua.- Batzar Orokorrak hautatuko ditu Zuzendaritza Batzordeko kargudunak. Kargu horiek bi urterako izendatuko dira Batzordeak berariaz baliogabetu ezean. Kargudun berbera behin eta berriro hautatu ahal izango da.
- Bazkideen artean parte-hartzea eta txandakatzea sustatze aldera, Zuzendaritza Batzordeko karguek gehienez 5 urte iraungo dute. Salbuespen gisa, Batzarrak hala erabakitzen badu, Zuzendaritza Batzordeko kideak berraukeratu ahal izango dira, gehienez ere bost urteko epean aurrera.
- Zuzendaritza Batzordea berritzean kideen erdiak aldatuko dira, gutxi gorabehera. Horrela eginez, kide berrien eta zaharren eskarmentuak partekatzea bilatuko da.
17. artikulua.- Zuzendaritza Batzordeko kide izateko, ezinbestean baldintza hauek bete beharko dira:
- a) Adin nagusikoa izatea, eskubide zibil guztien jabe izatea, eta indarrean dauden legetan ezarritako bateraezintasun-arrazoirik ez izatea.
 - b) Estatutuaren aurreikusitako moduan izendatua izatea.
 - c) Izendatua izatea, estatutuaren ezarritakoarekin bat.
18. artikulua.- Zuzendaritza Batzordeko kide izateko, lehendabizi, Batzorde Orokorrak izangaia hautatu behar du eta, gero, izendatu horrek kargua onartu behar du.
- Zuzendaritza Batzordeko kideen dieta eta gastuak ordaintzea erabaki dezake Batzar Orokorrak.
19. artikulua.- Zuzendaritza Batzordeko kideek kasu hauetan utziko dituzte karguak:
- a) Agintealdia bukatzen denean.
 - b) Dimititzen baldin badute.
 - c) Bazkide izateari uzten diotenean, edo kargua betetzeko ezintasun-arrazoiak dituztenean.
 - d) Estatutu hauetako 16. artikulua aplikatuz, Batzar Orokorrak kargua baliogabetzea erabakitzen duenean.
 - e) Hiltzen baldin badira.

“a)” idatz-zatian agertzen dena baldin bada kargua uzteko arrazoia, Zuzendaritza Batzordeko kideek jardunean jarraituko dute lehenengo batzar orokorra egin arte. Batzar horretan aukeratuko dira kargudun berriak.

b), c), d) eta e) idatz-zatietan agertzen dena baldin bada arrazoia, hutsik gelditutako kargua betetzeko norbait behin-behingo izendatuko du Zuzendaritza Batzordeak, eta Batzar Orokorrak erabakiko du izendapena onetsi ala ez. Ezetsi egiten badu, behar diren kargu-izendapenak egingo ditu.

Organo honen osaeran egiten diren aldaketa guztien berri emango zaio Elkartearen Erregistroari.

20. artikulua.- Honako hauek dira Zuzendaritza Batzordearen zereginak:

- a) Elkartearen eguneroko kudeaketaz arduratzea, Batzar Orokorraren jarraibideekin bat etorritik eta haren kontrolpean.
- b) Elkarrekin aurrera eramango dituen ekintzen egitaraua egitea.
- c) Gastu eta sarreraren urteko aurrekontua eta aurreko urteko kontuen egoera-orria Batzar Orokorrari aurkeztea, hark onartu ditzan.
- d) Batzar Orokorraren bileretako gai-zerrendak egitea, eta ohiko nahiz ezohiko batzar orokorretarako deialdiak egitea erabakitzea.
- e) Bazkideek egiten dituzten proposamen eta iradokizunei erantzutea eta horien inguruan hartu beharreko neurriak hartzea.
- f) Estatutu hauetako aginduak interpretatzea eta Estatutuaren hutsuneak betetzea, betiere elkartearen inguruan indarrean dauden legeekin bat etorritik.
- g) Batzar Orokorrak berariazko erabakien bidez ematen dizkion eskumenak erabiltzea, betiere ez badira haren eskumen esklusibokoak.
- h) Aztertzea eta onartzea, hala bada, bazkide izateko eskaerak.
- i) Bazkideen kanporaketa beharrezkoa denean, Batzar Orokorrari proposatzea.
- j) Bazkidetza ematea edo kentzeari buruz erabakitzea.
- k) Soldatuko pertsonak kontratatzea edo kaleratzea.
- l) Beste edozein eginkizuna, betiere Batzar Orokorraren eskumen esklusibokoa ez bada.
- m) Barne Araudia egitea.
- n) Estatutuen aldaketa proposatzea.
- o) Batzorde eragileak nahiz aztertzaileak sortzea, zeinak Zuzendaritza Batzordeko kide batek edo gehiagok koordinatu ahal izango dituzten.
- p) Salbuespenezko egoeretan, Zuzendaritza Batzordeak behin-behinean kargugabetu ahal izango du batzordekideetako bat. Hurrengo Batzar Orokorrak erabakiko du hura behin betiko kargugabetzen duen ala ez.

21. artikulua.- Zuzendaritza Batzordeak bere nahiz pertsona bakarreko organoen funtzio guztiak edo horietako zenbait eskuordetu ahal izango ditu, propio izendatuko dituen zuzendaritzako langileen esku utziz. Langileok izango dituzten mugak eta erantzukizunak ere zehaztuko ditu, baita eskuordeturiko funtzioa betetzen dela ziurtatu ere. Horretarako, zuzendaritzako langileen aldeko notario-ahalordea eman ahal izango du, zeinean Zuzendaritza Batzordeak jarritako mugapenak eta emaniko ahalak jasoko diren.

22. artikulua.- Zuzendaritza Batzordearen bilkurak lehendakariak erabaki edo batzordekide batek eskatzen duen bakoitzean egingo dira. Bilkurako buru lehendakaria izango da, ez balego, lehendakariordea; eta horien faltan, batzordekide zaharrena.

Batzordeak hartutako erabakiak baliozkoak izateko, biltzen diren batzordekideen gehiengoak aldeko botoa eman behar du.

Horretarako, gutxienez batzordekideen kopuruaren erdiak egon beharko du bilkuran. Berdinketarik egonez gero, lehendakariaren kalitateko botoa izango da erabakiko duena.

Idazkariak bilera-aktak egingo ditu eta akta horiek gero dagokion liburuan transkribatuko dira.

KIDE BAKARREKO ORGANOAK

LEHENDAKARIA

23. artikulua.- Lehendakariak beregain hartuko du elkartearen legezko ordezkariak, eta Zuzendaritza Batzordeak eta Batzar Orokorrak hartutako erabakiak gauzatu ditu. Era berean, aipaturiko bi organo horietako lehendakaria izango da.
24. artikulua.- Lehendakariak honako hauek denak egiteko ahalmena izango du:
- a) Zuzendaritza Batzordearen eta Batzar Orokorraren bilera-deiak egin, bilerak bukatutzat eman, bileretan sortzen diren eztabaidak bideratu, eta boto-berdinketa gertatuz gero kalitate-botoarekin erabakitzea.
 - b) Elkartearen ekintzen egitasmoa Zuzendaritza Batzordeari proposatzea eta elkartearen zereginak bultzatu eta bideratzea.
 - c) Baliotasunez erabakitako ordainketak egiteko agintzea.
 - d) Sortzen diren premiazko arazoak konpontzea, eta egiten den lehenengo bilkuran Zuzendaritza Batzordeari horren berri ematea.
 - e) Batzar Orokorrak berariazko erabaki bidez ematen dizkion eskumenak erabiltzea, betiere ez badira haren eskumen eskusibokoak.
 - f) Diruzaina edo behar bezala baimendutako Zuzendaritza Batzordearen beste kide batekin batera, Elkartearen dirua erabiltzeko baimena ematea, baita ere agiriak, aktak eta korrespondentzia sinatzea.

LEHENDAKARIORDEA

25. artikulua.- Lehendakariordeak lehendakariari lagunduko dio, eta lehendakariak aldi batean bere kargua bete ezin badu, lehendakariordeak ordezkatu du. Era berean, lehendakariak berariaz eskuordetzen dizkion ahalmen guztiak izango ditu.

IDAZKARIA

26. artikulua.- Idazkariari dagokio, zehazki, elkartean sartzeko eskabideak jaso eta izapidetzea, fitxategia eta Bazkideen Erregistro Liburua zaintzea, eta Akta Liburuaren zaintzaren eta idazketaren ardura izatea.
- Era berean, elkartearen arloan indarrean dauden legezko xedapenak betetzeaz arduratuko da, erakundearen agiri ofizialak zainduz, elkarteko liburuen eta artxiboen edukia egiaztatuz eta Zuzendaritza Batzordeko izendapenen eta egoitza sozialaren aldaketan berri emateko egin beharreko jakinerazpenak eginez agintari eskudunari.

DIRUZAINA

27. artikulua.- Egindako diru-sarrera eta ordainketen berri emango du diruzainak, eta diru-sarrera eta gastuen urteroko aurrekontua eta aurreko urteko kontuen egoera ere jakinaraziko du. Horiek guztiak Zuzendaritza Batzordeari aurkeztu behar dizkio, eta horrek Batzar Orokorrari, hark onartu ditzan. Era berean, Lehendakariarekin batera, propio izendaturiko zuzendaritzako langileei funtsak

erabiltzeko eta hirugarrenei ordaintzeko baimena emango die. Langileok amankomunean jardungo dute, Barne Araudiak ezarritako mugen baitan.

KIDEAK

28. artikulua.- Zuzendaritza Batzordeko kide gisa duten karguari dagozkion betebeharrak (elkartearen zuzendaritza eta kudeaketa arrunta) izango dituzte, bai eta Batzordeak berak agintzen dizkienak ere.

HIRUGARREN KAPITULUA

BAZKIDEAK: ONARTUAK IZATEKO BALDINTZA ETA PROZEDURAK, ETA BAZKIDE-MOTAK

29. artikulua.- Elkartearen bazkide izan daitezke horrela nahi duten eta honako baldintza hauek betetzen dituzten pertsona fisikoek nahiz juridikoek:
- Adin nagusikoa edo adingabe emantzipatua izatea, norberaren eskubideak erabiltzeko inolako lege-baldintzaren menpe ez egotea eta ebazpen judizial irmoaren bidez eskubideen erabilera mugatuta ez edukitzea.
 - Pertsona juridikoa izanez gero, organo eskudunak bere baitan baliozkotasunez hartutako erabakiaren kopia aurkeztea, eta bertan elkartze-borondatea adieraztea, bai eta haien izenean diharduenaren izendapena ere
 - Inskripzio eta urteroko kuota ordaintzea. Kuota horiek inola ere ez dira bueltatuko.
 - Elkartearen helburuak onartzea.
- Bazkide-izaerari dagozkion alderdiak — hirugarrenek izan litzaketen onurak, sarrera-kuota, urteko kuota, ordaintzeko modua eta gainerako betebeharrak—, Barne Araudian zehaztuko dira.
- Baldintza hauetako baten bat ez betetzekotan, Estatutu hauetan agintzen den zigor-erregimena ezarriko zaio bazkideari, Elkartetik kanporaketa barne.
30. artikulua.- Elkartean sartu nahi duenak idatziz aurkeztu beharko du bere eskabidea, Lehendakariari zuzenduta. Lehendakariak eskaeraren berri emango dio Zuzendaritza Batzordeari, zeinak, bazkide-gaia elkarrizketatu ondoren, hura elkartean onartu ala ez erabakiko duen. Erabakiaren aurkako gorako errekurtsioa jarri ahal izango da Batzar Orokorrean.

BAZKIDEEN ESKUBIDEAK ETA BETEBEHARRAK

31. artikulua.- Bazkide guztiek honako hauek denak egiteko eskubidea dute:
- a) Elkarreei buruzko Legearen edo Estatutuen kontrako erabaki eta jardunak inpugnatzea, inpugnatutako erabakiaren edukia ezagutu duten edo ezagutzeko aukera izan duten egunetik egutegiko 40 eguneko epean.
 - b) Elkartearen gobernu- eta ordezkaritza-organoen osakerari, elkartearen kontu-egoerari eta elkartearen jarduerari buruzko informazioa jasotzea.
 - c) Elkarteko beste bazkideen nortasuna, diru-sarreraren eta gastuen egoera, eta elkartearen ekintzen garapenaren berri edozein unetan izatea, datu pertsonalak babesteko arautegian aurreikusitako moduan.
 - d) Batzar orokorretarako deiak jasotzea, batzar orokorretara joan eta hitz egin eta botoa emateko eskubidea erabiltzea, eta eskubide hori beste bazkideren baten esku utzi ahal izatea.

- e) Elkartearen Estatutu hauen arabera, elkarteko zuzendaritza-organoetan parte hartzea eta organo horietarako hautatzaile nahiz hautagai izatea.
- f) Indarrean dauden legeetan zehaztutako bazkideen fitxategian agertzea.
- g) Estatutuen eta, egonez gero, barne-araudiaren ale bana edukitzea, eta zuzendaritza-organoei eskakizunak eta keak aurkeztea.
- h) Talde-ekintza sozialetan parte hartzea, eta bazkideentzako tresnak erabiltzea (elkartearen egoitza, liburutegiak, eta abar).
- i) Bazkideari diziplinazko neurriak ezarri aurretik, bazkideak idatziz adierazitakoa kontuan hartzea eta neurri horiek hartzea eragin duten arrazoiei buruzko azalpenak jasotzea. Neurriak hartzeko arrazoiak bazkideei dagozkien betebeharrak ez betetzean soilik oinarritu daitezke.
- j) Edozein unetan baja ematea. Hala ere, hartu bai baina bete gabe dituzten konpromisoak bete beharko dituzte.

32. artikulua.- Bazkideen betebeharrak hauek dira:

- a) Elkartearen helburuekin bat etortzea eta helburu horiek betetzen laguntzea.
- b) Kuotak, derramak eta Estatutuen arabera bazkide bakoitzari dagozkion bestelako ekarpenak ordaintzea.
- c) Elkartearen antolamendu eta jardueretan parte hartzea.
- d) Estatutuetatik eratorritako bestelako betebeharrak betetzea.
- e) Elkarteko zuzendaritza-organoek baliotasunez hartutako erabakiei men egin eta erabaki horiek betetzea.
- f) Elkartearen baliabide eta produktuak irabazi-asmorik gabe erabili behar ditu.

BAZKIDE IZATEARI UZTEA

33. artikulua.- Bazkide izateari uzteko arrazoiak honakoak izango dira:

- a) Hil egitea (edo, pertsona juridikoen kasuan, desegitea).
- b) Bazkidea bere borondatez joatea.
- c) Arrazoi hauengatik, bazkide izateari uzteko zigorra jasotzea: Estatutuotatik eratorritako betebeharrak eta Batzar Orokorrak edo Zuzendaritza Batzordeak baliotasunez hartutako erabakietan ezarritako betebeharrak nahita eta larriki behin eta berriz hausteagatik.

ZIGOR-ARAUAK

34. artikulua.- Zuzendaritza Batzordeak bazkideak zigortu ahal izango ditu, honako kasu hauetan:

- a) Behin eta berriz hausten badituzte Estatutuak edo Batzar Orokorrak nahiz Zuzendaritza Batzordeak hartutako erabakiak.
- b) Portaera okerra izateagatik.
- c) Elkarteari ospea kentzea, elkarteak antolatutako ekitaldiak edo bazkideen ohizko bizikidetasun larriki oztopatzeko asmoz egindako ekintza nahiz hitzez.

15 egunetik hilabetera eskubideak kentzetik hasi eta elkartetik betiko kanporatzera arteko zigorra ezar daiteke, ondorengo artikuluek adierazitako moduan.

Horretarako, zigorgarriak izan daitezkeen jokabideak aztertzeko ikerketa egin dadila erabaki dezake lehendakariak. Ikerketaren

instrukziogilea idazkaria izango da, eta berak proposatuko dizkio Zuzendaritza Batzordeari hartu beharreko neurriak.

Zigorra ezartzeko ahalmena Zuzendaritza Batzordeak izango du, idazkariak ez du horretan parte-hartzerik izango (instrukziogilea delako), eta zigorra ezarri aurretik interesdunari entzunaldia eskainiko zaio. Zigortzeko erabakia arrazoitu egin beharko da beti, eta erabaki horren aurkako errekurtsioa jarri ahalko zaio Batzar Orokorrari.

35. artikulua.- Bazkideren batek elkartetik kanporatua izateko moduko ustezko egintzaren bat egiten bada, hau da, Estatutuotatik eratorritako betebeharrak eta Batzar Orokorrak edo Zuzendaritza Batzordeak baliotasunez hartutako erabakietan ezarritako betebeharrak nahita eta larriki behin eta berriz hausten baditu, gertaeren berri izatearren, lehendakariak idazkariari agindu diezaioke aurretiazko eginbide zehatz batzuk egin ditzala, behar den informazioa jasotzeko. Eginbide horiek ikusita, lehendakariak jarduerak artxibatzeke agintzea edo elkartetik kanporatzeko zigor-espeditentari hasiera ematea erabaki dezake.
36. artikulua.- Elkartetik kanporatzeko zigor-espeditentea hasten bada, idazkariak, gertakariak egiaztatu ondoren, idatzi bat bidaliko dio interesdunari, leporatzen zaizkion karguen berri emateko. Kargu horiei erantzuteko, interesdunak bere aldeko arrazoiak azaldu ahal izango ditu hamabost eguneko epean. Epe hori amaituta, edonola ere, Zuzendaritza Batzordearen lehenengo bilkurako gai-zerrendan sartuko da kasua, eta batzordeak hartuko du erabakia. Erabakian ez du botorik izango espeditenteko instrukziogilea izan den idazkariak.
- Elkartetik kanporatzeko erabakia interesdunari jakinaraziko zaio eta, era berean, hurrengo ezohiko batzar orokorrean errekurtsioa aurkez dezakeela azalduko zaio. Hiru hilabeteren barruan batzar horretarako deirik egiten ez bada, errekurtsioa ebatzeko batzarrerako deia egin beharko da. Bitartean, Zuzendaritza Batzordeak inputatuari bazkide-eskubideak etetea erabaki ahal izango du, eta Zuzendaritza Batzordeko kide bada, kargu hori utzarazi beharko dio.
- Batzar Orokorrari kanporatzeko espeditentea aurkeztuz gero, idazkariak espeditentearen laburpena egingo du, Zuzendaritza Batzordeak interesdunak aurkeztutako idatziaren eta egintzen berri zehatza Batzar Orokorrari eman ahal izateko, azken horrek dagokion erabakia har dezan.
37. artikulua.- Kanporatzeko erabakia arrazoitu egin behar da beti, eta erabaki hori interesdunari jakinarazi behar zaio. Interesdunak, eskubideaz baliatuz, auzitegietara jo ahal izango du bere ustez erabakia legearen edo Estatutuen aurkakoa bada.
38. artikulua.- Bazkideren bati kanporaketaren berri ematerakoan —berak nahi izanda edo zigorra ezarri zaiolako— bete gabe dituen betebeharrak bete ditzala eskatuko zaio.

LAUGARREN KAPITULUA

GIZARTE ONDARE ETA AURREKONTU-ARAUBIDEA

39. artikulua.- Elkartek ez du ondare sozialik.
40. artikulua.- Elkartek, bere jarduerak aurrera eramateko, diru-baliabide hauek aurreikusten ditu:
- a) Sarrera-kuotak.
 - b) Erabakitzen diren aldizkako kuotak.
 - c) Elkartearen ondasun eta eskubideetatik datozen emaitzak, eta legez jasotzen dituen diru-laguntzak, legatuak eta dohaintzak.

- d) Zuzendaritza Batzordeak Estatutuen helburuak lortzeko egin beharreko zat jotzen dituen jarduera zilegietatik datozen diru-sarrerak.

Elkarte- eta ekonomia-ekitaldia urtekoa izango da, eta urte bakoitzeko abenduaren 31ean itxiko da.

Jarduera ekonomikoak gauzatuz (zerbitzuak ematea barne) elkarteak lortzen dituen irabaziak bere helburuak betetzeko baino ez dira erabili behar. Inola ere ezingo dira bazkideen artean banatu, ez eta haien ezkontideen edota haiekin antzeko afektibitate-harremanean bizi diren pertsonen artean eta haien senideen artean ere. Ezingo zaizkie, halaber, irabazteko asmoa duten pertsona juridiko edo fisikoei doan laga.

BOSGARREN KAPITULUA

ESTATUTUAK ALDATZEA

41. artikulua.- Estatutuak aldatzea propio horretarako deitutako bazkideen ezohiko batzar orokorrean erabaki behar da. Zuzendaritza Batzordeak hiru bazkidek osatutako batzorde-txostengile bat izendatuko du, aldaketa-egitasmoa idazteko. Egitasmo hori Zuzendaritza Batzordeak ezarritako jarraibideen arabera egingo da, eta batzorde berak jarriko du egitasmoa amaitzeko epea.
42. artikulua.- Aldaketa-egitasmoa epe barruan idatzi eta gero, lehendakariak Zuzendaritza Batzordearen hurrengo bilkurako gai-zerrendan sartuko du. Zuzendaritza Batzordeak egitasmoa onartuko du edo, bestela, lantaldeari itzuliko dio, berriz aztertu dezan.
- Egitasmoa onartuz gero, Zuzendaritza Batzordeak hurrengo batzar orokorreko gai-zerrendan sartzea erabakiko du edo, bestela, horretarako propio batzar orokor baterako deia egitea.
43. artikulua.- Batzarrerako deiarekin batera, Estatutu-tuetako aldaketen testua bidaliko da, bazkideek egoki iruditzen zaizkien zuzenketak Idazkaritzan aurkeztu ahal izateko. Zuzenketa horiek Batzar Orokorrari helaraziko zaizkie, batzarra egin baino zortzi egun lehenago jaso badira Idazkaritzan.
- Zuzenketak banaka nahiz taldeka egin daitezke, idatziz, eta aukerako beste testu bat izan behar dute. Zuzenketak bozkatu ostean, Batzar Orokorrak Estatutuak aldatzeko erabakia hartuko du, eta Elkartearen Erregistro Orokorrean inskribatzen denetik aurrera baino ez du eragina izango hirugarrenengan.

SEIGARREN KAPITULUA

ELKARTEA DESEGITEA ETA ELKARTE-ONDAREAREN ZERTARAKOA

44. artikulua.- Elkartearen arrazoi hauengatik desegingo da:
- Bazkideek hala nahi dutelako. Nahi hori horretarako bildutako ezohiko batzar orokorrean azaldu behar dute.
 - Estatutu-tuetan finkatutako epea edo baldintza bete delako.
 - Beste elkarte batek xurgatu duelako edo beste elkarte batzuekin bat egin duelako.
 - Legez ezarritako gutxienezko bazkide-kopururik ez duelako.
 - Epai irmo batek elkartearen desegitea agintzen duelako.
 - Elkartearen helburuak betetzea ezinezkoa delako.
45. artikulua.- Elkartearen deseginez gero, desegiteko erabakia hartu duen Ezohiko Batzar Orokorrak Kitapen Batzordea izendatuko du. Batzorde hori

Zuzendaritza Batzordeko hiru kidek osatuko dute eta dagoen diruaz arduratuko da.

Bazkideekiko eta besteekiko elkarre-betebeharrak bete ondoren, geratzen den elkarre-ondarea, geratzen bada behintzat, irabazi-asmorik gabeko erakunde bati edo irabazi-asmorik gabeko ekimenei bati eman beharko zaio.

AZKEN XEDAPENA

Estatutu hauek garatzeko asmoz, Batzar Orokorrak Barne-araudia onartu ahal izango du, baina horrek inolaz ere ez ditu Estatutuetako aginduak aldatuko.

Vitoria-Gasteizen, 2019ko ekainaren 10ean

LEHENDAKARIAK
Ainara Crespo

IDAZKARIAK
Maite Garmendia